

## Skupština Kantona

Na osnovu člana 12. stav 1. tačka c. i člana 18. stav 1. tačka b. Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01 i 28/04), Skupština Kantona Sarajevo, na sjednici održanoj 21. jula 2011. godine, donijela je

### ZAKON O ISTAKNUTIM SAMOSTALNIM UMJETNICIMA

#### I - OSNOVNE ODREDBE

##### Član 1. (Sadržaj Zakona)

Ovim Zakonom uređuju se uslovi za sticanje statusa istaknutog samostalnog umjetnika, prava i obaveze istaknutih samostalnih umjetnika i druge mjere za podsticanje kulturnog i umjetničkog stvaralaštva na području Kantona Sarajevo (u daljnjem tekstu: Kanton).

##### Član 2. (Samostalni umjetnik i istaknuti samostalni umjetnik)

- (1) Samostalni umjetnik u smislu ovog zakona je svaki umjetnik koji se bavi umjetnošću samostalno kao svojim jedinim zanimanjem.
- (2) Istaknuti samostalni umjetnik je umjetnik iz stava (1) ovog člana kome je status istaknutog samostalnog umjetnika priznat u skladu sa odredbama ovog Zakona.

##### Član 3. (Opšti uslovi za sticanje statusa istaknutog samostalnog umjetnika)

- (1) Umjetnik u smislu ovog Zakona stiče pravo na status istaknutog samostalnog umjetnika ako ispunjava slijedeće opšte uslove:
  - a) da nije u radnom odnosu;
  - b) da mu je umjetničko stvaralaštvo i djelovanje jedino profesionalno zanimanje;
  - c) da njegov umjetnički opus i umjetnički domet verifikuje matično umjetničko udruženje, a ukoliko nije član niti jednog udruženja da svoj stvaralački opus dokaže programskom knjižicom ili popisom umjetničkih djela potvrđenim od kulturne institucije, javne ustanove, festivala, galerije ili izdavačke kuće sa međunarodnim referencama;
  - d) da je državljanin Bosne i Hercegovine koji ima prebivalište i umjetnički djeluje na području Kantona.
- (2) Status istaknutog samostalnog umjetnika stiče se na osnovu uslova utvrđenih u stavu (1) ovog člana i bližih uslova za priznavanje statusa istaknutog samostalnog umjetnika utvrđenih Odlukom iz člana 13. stav (2) ovog Zakona.

##### Član 4. (Pravo na udruživanje i organizovanje samostalnih umjetnika)

Samostalni umjetnici se prema područjima umjetničkog stvaralaštva, a u cilju ostvarivanja zajedničkih interesa, mogu udruživati i organizovati u umjetnička i strukovna udruženja i društva, te druge oblike organizovanja.

## Član 5.

### (Područja umjetničkog stvaralaštva samostalnih umjetnika)

- (1) Područja umjetničkog stvaralaštva samostalnih umjetnika u kojim ostvaruju ovim zakonom propisana prava su: filmsko, muzičko, književno (književno i književno prevodilačko stvaralaštvo), likovno (likovno i primijenjeno likovno stvaralaštvo), izvođačko (scensko, pozorišno i baletno stvaralaštvo), te interdisciplinarno i multimedijalno umjetničko stvaralaštvo.
- (2) Bliži uslovi za priznavanja statusa istaknutog samostalnog umjetnika u područjima umjetničkog stvaralaštva iz stava (1) ovog člana uredit će se odlukom iz člana 13. stav (2) ovog Zakona.

## II - PRIZNAVANJE STATUSA ISTAKNUTOG SAMOSTALNOG UMJETNIKA

### Član 6.

#### (Imenovanje Stručne komisije)

- (1) Vlada Kantona Sarajevo (u daljnjem tekstu: Vlada) na prijedlog ministra kulture i sporta Kantona Sarajevo (u daljnjem tekstu: ministar) imenuje Stručnu komisiju (u daljnjem tekstu: Stručna komisija) kao konsultativno tijelo radi rješavanja statusa, prava i obaveza istaknutih samostalnih umjetnika.
- (2) Stručna komisija se imenuje na inicijativu umjetničkih udruženja, društava i javnih ustanova kulture sa sjedištem na području Kantona Sarajevo, a prema području umjetničkog stvaralaštva iz člana 5. ovog Zakona.
- (3) Stalni sastav Stručne komisije čini pet članova i to:
  - a) jedan predstavnik Ministarstva kulture i sporta Kantona Sarajevo (u daljnjem tekstu: Ministarstvo);
  - b) četiri istaknuta umjetnika, predstavnika različitih područja umjetnosti iz člana 5. ovog Zakona.

### Član 7.

#### (Promjenjivi članovi Stručne komisije)

- (1) Za svako područje samostalnog umjetničkog djelovanja iz člana 5. ovog Zakona, Vlada na prijedlog ministra, a na Inicijativu udruženja, društava iz člana 4. ovog Zakona, te javnih ustanova kulture sa sjedištem na području Kantona Sarajevo, ovisno o potrebi može imenovati po četiri promjenljiva člana Stručne komisije kada su na dnevnom redu pitanja iz područja njihovog djelovanja.
- (2) Postupak i način rada Stručne komisije uređuje se bliže njenim poslovnikom o radu.

### Član 8.

#### (Sredstva za rad Stručne komisije)

- (1) Sredstva za rad Stručne komisije obezbjeđuju se u Budžetu Kantona Sarajevo (u daljnjem tekstu: Budžet Kantona).
- (2) Visinu naknade za rad Stručne komisije utvrđuje Vlada na prijedlog ministra, a u skladu sa važećim propisima i raspoloživim budžetskim sredstvima.

Član 9.  
(Mandat stalnih članova Stručne komisije)

- (1) Mandat stalnih članova Stručne komisije traje četiri godine.
- (2) Stalni članovi Stručne komisije mogu biti razriješeni i prije isteka mandata:
  - a) na vlastiti zahtjev,
  - b) zbog neopravdanog odsustvovanja iz rada Stručne komisije u trajanju dužem od tri mjeseca,
  - c) zbog neurednog i neblagovremenog izvršavanja poslova iz nadležnosti Stručne komisije.

Član 10.  
(Rješenje o imenovanju i razrješenju stalnih članova Stručne komisije)

Vlada Kantona donosi Rješenje o imenovanju i razrješenju stalnih članova Stručne komisije u skladu sa čl. 6. do 9. ovog Zakona.

Član 11.  
(Zahtjev za sticanje statusa istaknutog samostalnog umjetnika)

- (1) Zainteresovani umjetnik je obavezan podnijeti zahtjev Ministarstvu za sticanje statusa istaknutog samostalnog umjetnika na obrascu koji propisuje ministar.
- (2) Podnosilac zahtjeva je obavezan da, uz zahtjev, priloži i slijedeću dokumentaciju:
  - a) umjetničku biografiju i bibliografiju potvrđenu od strane matičnog udruženja/društva/javne ustanove kulture ili ukoliko nije član niti jednog udruženja da svoj stvaralački opus dokaže programskom knjižicom ili popisom umjetničkih djela potvrđenim od kulturne institucije, javne ustanove, festivala, galerije ili izdavačke kuće sa međunarodnim referencama;
  - b) kopiju dodijeljenih priznanja i nagrada za umjetničko stvaralaštvo;
  - c) mišljenje strukovnog udruženja, društva ili javne ustanove kulture;
  - d) kopiju lične karte i prijave prebivališta;
  - e) potvrdu nadležne službe za zapošljavanje Kantona Sarajevo da je nezaposlen ili kopiju radne knjižice.

Član 12.  
(Postupak po zahtjevu za priznavanje statusa istaknutog samostalnog umjetnika)

- (1) Ministarstvo, na prijedlog Stručne komisije, svojim rješenjem utvrđuje status istaknutog samostalnog umjetnika ili odbija zahtjev podnosioca.
- (2) Postupak rješavanja po zahtjevu za priznavanje statusa istaknutog samostalnog umjetnika vodi se skladu sa odredbama ovog Zakona, Zakona o upravnom postupku i Odluke o bližim kriterijima za priznavanje statusa istaknutih samostalnih umjetnika.
- (3) Protiv rješenja iz stava (1) ovog člana, a u roku od 15 dana od njegovog dostavljanja, dozvoljena je žalba ministru.
- (4) Rješenje ministra je konačno u upravnom postupku i protiv njega se može voditi upravni spor kod nadležnog suda.

Član 13.  
(Bliži uslovi za priznavanje statusa)

- (1) Kandidat za priznavanje statusa istaknutog samostalnog umjetnika pored opštih uslova iz člana 3. stav (1) al. a), b), c) i d) ovog Zakona mora ispunjavati i slijedeće uslove:
  - a) javno umjetnički djelovati najmanje tri godine;
  - b) ostvariti međunarodne i domaće nagrade i priznanja za svoje umjetničko djelovanje;
  - c) pribaviti preporuku matičnog umjetničkog udruženja, društva ili javne ustanove ili mišljenje odgovarajućeg umjetničkog udruženja o vrijednosti njegovog umjetničkog stvaralaštva ili ukoliko nije član niti jednog udruženja da svoj stvaralački opus dokaže

programskom knjižicom ili stvaralačkim djelima potvrđenim od kulturne institucije, javne ustanove, festivala, galerije ili izdavačke kuće sa međunarodnim referencama.

- (2) Bliže uslove za priznavanje statusa istaknutih samostalnih umjetnika utvrđuje Vlada Kantona Odlukom o bližim kriterijima za priznavanje statusa istaknutih samostalnih umjetnika za svako pojedino područje umjetničkog stvaralaštva, a na usaglašen prijedlog postojećih udruženja/društava koji okupljaju samostalne umjetnike na području Kantona Sarajevo.

#### Član 14.

(Pravo na uplatu doprinosa)

- (1) Pod uslovima utvrđenim ovim Zakonom, istaknuti samostalni umjetnik sa priznatim statusom ostvaruje pravo na uplatu doprinosa za penzijsko i invalidsko, te zdravstveno osiguranje u skladu sa odredbama zakona kojim se uređuje uplata doprinosa za samostalna zanimanja iz Budžeta Kantona i u granicama sredstava planiranih Budžetom Kantona za ovu namjenu.
- (2) Istaknuti samostalni umjetnik za ostvarivanje prava iz stava (1) ovog člana, potrebno je da Ministarstvu podnese:
  - a) ovjerenu izjavu datu pod moralnom i materijalnom odgovornošću da je prijavio sve svoje prihode poreskoj upravi;
  - b) dokaze o kontinuiranom umjetničkom djelovanju;
  - c) poresko uvjerenje.

#### Član 15.

(Pravo na uplatu doprinosa)

- (1) Pravo na uplatu doprinosa za penzijsko-invalidsko osiguranje i zdravstveno osiguranje iz Budžeta Kantona za tekuću godinu ima istaknuti samostalni umjetnik koji kontinuirano djeluje, te podnese dokumentovan izvještaj u skladu sa odredbama člana 11. stav (2) o svom umjetničkom djelovanju u prethodnoj kalendarskoj godini najkasnije do 31. decembra prethodne godine.
- (2) Istaknuti samostalni umjetnik može uplaćivati doprinos za svoje dobrovoljno penzijsko invalidsko osiguranje u skladu sa odredbama zakona i drugih propisa kojim se uređuje penzijsko-invalidsko osiguranje, ukoliko nisu ispunjeni uslovi da mu se doprinosi uplaćuju iz Budžeta.

#### Član 16.

(Odluka o uslovima i postupku priznavanja statusa)

Odluku o uslovima i postupku priznavanja prava istaknutih samostalnih umjetnika na uplatu doprinosa iz Budžeta Kantona Sarajevo (u daljnjem tekstu: Odluka) donosi Vlada, na prijedlog Ministarstva, a na inicijativu postojećih umjetničkih udruženja registrovanih na području Kantona koja udružuju samostalne umjetnike.

### III - DRUGA PRAVA I OBAVEZE SAMOSTALNIH UMJETNIKA

#### Član 17.

(Obavljanje djelatnosti samostalno i u saradnji)

Samostalni umjetnik ima pravo da svoju umjetničku djelatnost obavlja samostalno ili u saradnji sa fizičkim i pravnim licima koja iskažu interes za njihov umjetnički rad, a naročito: umjetničkim udruženjima/društvima, izdavačkim kućama, njihovim menadžmentima, agentima, filmskim producentima i distributerima, pozorištima, umjetničkim galerijama i drugim umjetničkim i kulturnim institucijama.

Član 18.  
(Zaključivanje ugovora)

Samostalni umjetnik ima pravo i obavezu da sa pravnim i fizičkim licima iz člana 17. ovog Zakona zaključuje autorske, sponzorske, donatorske, kupoprodajne i druge poslovne ugovore u zemlji i inostranstvu shodno važećim zakonima i drugim propisima.

Član 19.  
(Izvoz i iznošenje umjetničkih djela u inostranstvo)

Samostalni umjetnik ima pravo izvoziti i iznositi u inostranstvo, priređivati samostalne i grupne izložbe, prodavati u inostranstvu, te javnosti prezentovati u svim oblicima stvaralaštva sopstveno umjetničko djelo shodno ovom Zakonu, kao i zakonima i drugim propisima kojim se uređuju vanjsko-trgovinski odnosi i autorska prava.

Član 20.  
(Otvaranje žiro i deviznog računa i poslovanje)

- (1) Samostalni umjetnik ima pravo i obavezu da za potrebe svog umjetničkog djelovanja otvori žiro i devizni račun shodno važećim propisima u oblasti bankarskih usluga.
- (2) Pri kupovini sredstava za rad u zemlji i inostranstvu, kao i istraživačkih projekata u zemlji i inostranstvu, ulaganje sopstvenih sredstava u umjetničke projekte priznaje se kao trošak i ne ulazi u netto prihod.

Član 21.  
(Štambilj istaknutog samostalnog umjetnika)

Istaknuti samostalni umjetnik ima pravo na pravougaoni štambilj standardnih dimenzija na kojem je utisnuto: "KANTON SARAJEVO - ISTAKNUTI SAMOSTALNI UMJETNIK", te ime i prezime i umjetnička oblast, na jednom od jezika i pisama koji su u službenoj upotrebi u Bosni i Hercegovini i na jednom od stranih pisama, koji odabere istaknuti samostalni umjetnik, a koji koristi pod punom moralnom, materijalnom i krivičnom odgovornošću.

Član 22.  
(Naknada plaće za slučaj bolesti i privremene nesposobnosti za rad)

- (1) U slučaju privremene spriječenosti za rad zbog bolesti u dužem trajanju od 42 radna dana, istaknuti samostalni umjetnik ima pravo na novčanu naknadu iz sredstava Zavoda za zdravstvenu zaštitu Kantona Sarajevo u skladu sa odredbama zakona kojim se uređuje zdravstveno osiguranje i ovog Zakona.
- (2) U slučaju privremene spriječenosti za rad zbog porodijskog odsustva, istaknutom samostalnom umjetniku pripadaju prava na naknade iz sredstava Zavoda za zdravstvenu zaštitu Kantona Sarajevo po osnovu uplate doprinosa za zdravstveno osiguranje, po postupku, na način i u rokovima priznatim posebnim propisima iz oblasti zdravstvenog osiguranja.

Član 23.  
(Pravo na penziju i otpremninu)

- (1) Istaknuti samostalni umjetnik ima pravo na penziju u skladu sa Zakonom i drugim propisima kojim se uređuje penzijsko invalidsko osiguranje.
- (2) U slučaju kada istaknuti samostalni umjetnik ispunio uslove za odlazak u penziju, u tom slučaju, pripada mu pravo na isplatu otpremnine u visini tri prosječne netto plaće ostvarene u prethodnom mjesecu u Kantonu Sarajevo.
- (3) Sredstva iz stava (2) ovog člana isplaćuju se iz Budžeta Kantona.

#### IV - PRESTANAK PRAVA I MIROVANJE PRAVA ISTAKNUTIH SAMOSTALNIH UMJETNIKA

##### Član 24.

(Prestanak prava na uplatu doprinosa)

- (1) Prestanak prava istaknutom samostalnom umjetniku na uplatu doprinosa nastupa:
  - a) na vlastiti zahtjev, na određeni rok ili trajno;
  - b) ako zasnuje radni odnos;
  - c) ako boravi u inostranstvu u trajanju dužem od šest mjeseci u kontinuitetu;
  - d) ako ispunjava uslove za penziju;
  - e) ako u toku prethodne kalendarske godine nije umjetnički djelovao;
  - f) ako započne redovan studij;
  - g) ako ode na studijsko putovanje ili usavršavanje u inostranstvo u trajanju dužem od 24 mjeseca;
  - h) ako se u postupku revizije utvrdi da ne ispunjava uslove u skladu sa kriterijima iz ovog zakona;
  - i) ako bude pravosnažnom odlukom nadležnog suda upućen da izdržava kaznu zatvora u trajanju dužem od šest mjeseci.
- (2) U slučaju dugotrajne bolesti istaknutom samostalnom umjetniku ne prestaje sta tus istaknutog samostalnog umjetnika do konačnog izliječenja ili penzionisanja.
- (3) Boravkom u inostranstvu, u trajanju dužem od šest mjeseci u kontinuitetu, smatra se boravak za koji je istaknuti samostalni umjetnik dobio dozvolu za produženje privremenog boravka ili za trajno nastanjenje, što se dokazuje potvrdom od strane odgovarajućeg predstavništva Bosne i Hercegovine u državi u kojoj boravi.
- (4) Istaknuti samostalni umjetnik koji je boravio u inostranstvu duže od šest mjeseci ili na studijskom putovanju ili usavršavanju dužan je dostaviti odjavu boravka iz zemlje u kojoj je boravio.

##### Član 25.

(Mirovanje prava na uplatu doprinosa za istaknutog samostalnog umjetnika)

Mirovanje prava na uplatu doprinosa za istaknutog samostalnih umjetnika nastupa:

- a) ako je izabran za funkcionera i imenovan od strane skupštine, odnosno drugih državnih, entitetskih, kantonalnih, gradskih ili općinskih organa ili tijela – do prestanka mandata;
- b) ako zasnuje radni odnos u trajanju od najduže jedne godine, do prestanka radnog odnosa, odnosno do isteka jedne godine;
- c) ako izdržava kaznu zatvora do šest mjeseci.

##### Član 26.

(Obnavljanje prava na uplatu doprinosa)

- (1) Istaknuti samostalni umjetnik kojem je pravo na uplatu doprinosa mirovalo, za obnavljanje prava na uplatu doprinosa treba podnijeti zahtjev Ministarstvu u roku od 15 dana od dana kada su prestali razlozi za mirovanje.
- (2) Ako istaknuti samostalni umjetnik ne podnese zahtjev u roku iz stava (1) ovog člana, ministar donosi rješenje o prestanku prava na uplatu doprinosa.

## V - MJERE ZA PROVOĐENJE ZAKONA

### Član 27.

(Prestanak statusa istaknutog samostalnog umjetnika)

Istaknutom samostalnom umjetniku prestaje status kojim se priznaje pravo na uplatu doprinosa i druga prava priznata ovim Zakonom, ako nepotpuno ili netačno prikaže svoju materijalnu situaciju iz čl. 14. i 15. stav (1) ovog Zakona.

### Član 28.

(Prestanak prava na uplatu doprinosa)

- (1) Rješenje o prestanku prava na uplatu doprinosa u slučajevima iz člana 24. stav (1), čl. 25., 26., 27. i 29. ovog Zakona donosi ministar.
- (2) Protiv rješenja iz stava (1) ovog člana, a u roku od 15 dana od njegovog dostavljanja, dozvoljena je žalba ministru.
- (3) Rješenje ministra je konačno u upravnom postupku i protiv njega se može voditi upravni spor kod nadležnog suda.

### Član 29.

(Revizija priznatih prava istaknutih samostalnih umjetnika)

- (1) Stručna komisija će svake godine po službenoj dužnosti izvršiti reviziju priznatih prava istaknutih samostalnih umjetnika na uplatu doprinosa iz Budžeta Kantona, a na osnovu relevantne dokumentacije koju je istaknuti samostalni umjetnik dužan priložiti u skladu sa odredbama ovog Zakona.
- (2) Ako istaknuti samostalni umjetnik u ostavljenom roku ne dostavi dokumentaciju iz stava (1) ovog člana prestaje mu status priznat ovim Zakonom.

### Član 30.

(Dobrovoljno osiguranje)

Samostalni umjetnik koji po odredbama ovog Zakona ne ostvaruje pravo na uplatu doprinosa iz Budžeta Kantona, ima pravo lično uplaćivati te doprinose.

### Član 31.

(Registar istaknutih samostalnih umjetnika)

- (1) Ministarstvo vodi registar istaknutih samostalnih umjetnika.
- (2) Sadržaj i način vođenja registra iz stava (1) ovog člana propisuje Vlada, Odlukom iz člana 32. tačka b) ovog Zakona.

## VI - PRIJELAZNE I ZAVRŠNE ODREDBE

### Član 32.

(Obaveza donošenja Odluka)

Obavezuje se Vlada, da u roku od tri mjeseca od dana stupanja na snagu ovog Zakona, donese:

- a) Odluku o uslovima i postupku priznavanja prava istaknutih samostalnih umjetnika na uplatu doprinosa iz Budžeta Kantona Sarajevo;
- b) Odluku o sadržaju i vođenju registra istaknutih samostalnih umjetnika;
- c) Odluku o bližim kriterijima za priznavanje statusa istaknutih samostalnih umjetnika.

Član 33.  
(Obaveza ažuriranja Registra)

Ministarstvo će ažurirati Registar istaknutih samostalnih umjetnika u roku od 60 dana od dana donošenja odluke iz člana 32. tačka b) ovog Zakona.

Član 34.  
(Zadržavanje stečenih prava)

- (1) Samostalni umjetnici kojima je do dana stupanja na snagu ovog Zakona priznato pravo na uplatu doprinosa, zadržavaju to pravo do okončanja postupka prve redovne godišnje revizije.
- (2) O daljnjem ostvarivanju toga prava odlučit će se prema odredbama ovog Zakona.
- (3) Nakon navršenih 60 godina života, sta tus istaknutog samostalnog umjetnika ne može biti predmet revizije.

Član 35.  
(Ostvarivanje prava nakon okončanja revizije)

Istaknuti samostalni umjetnici iz člana 34. stav (1) ovog Zakona, a koji ispunjavaju uslove po ovom Zakonu, nastavljaju ostvarivati prava iz ovog Zakona od dana izvršene prve godišnje revizije.

Član 36.  
(Prestanak primjene prethodnog Zakona)

Danom stupanja na snagu ovog Zakona, na području Kantona Sarajevo prestaje primjena Zakona o samostalnim umjetnicima ("Službene novine Kantona Sarajevo", broj 20/01).

Član 37.  
(Ravnopravnost spolova)

- (1) Gramatička terminologija korišćenja ženskog i muškog roda podrazumijeva uključivanje oba roda.
- (2) Kod imenovanja organa udruženja obezbijedit će se proporcionalna zastupljenost konstitutivnih naroda i ostalih, kao i ravnopravna zastupljenost spolova.

Član 38.  
(Stupanje na snagu ovog Zakona)

Ovaj Zakon stu pa na snagu osmog dana od dana objavljivanja u "Službenim novinama Kantona Sarajevo".

Broj 01-02-22456/11  
21. jula 2011. godine  
Sarajevo

Predsjedavajuća  
Skupštine Kantona Sarajevo  
Prof. dr. **Mirjana Malić**, s. r.